



Communicaziun a las medias

Emprima saira tematica naziunala da la SRG SSR

Il stgaurament dal clima s'avanza: co vesa ora la Svizra da damaun?

Cuir, ils 14-11-2017 – **Tge capita, sche la temperatura media è en Svizra trais grads pli auta? Tge consequenzas ha quai per la natira, per l'economia e per noss stil da viver? A questas dumondas sa deditgescha l'emprima saira tematica naziunala da la SRG SSR. Radiotelevision Svizra Rumantscha (RTR) preschenta ensemen cun ils moderaturs Andri Franziscus ed Annina Campell ils 29 da november 2017 a las 20.05 sin SRFinfo la saira tematica rumantscha «+3°».**

En il center da l'emission stat ina ficziun documentara cun il titel «Ina stad cun chaliras» (tudestg «Gefährlicher Sommer»). Ina famiglia en il chantun Vallais passenta ina stad da chaliras cun bleras fassetas. La mamma è dumandada sco commembra dal cussegl communal, il bab lavura sut cundiziuns difficilas en l'ospital ed ils uffants sentan ils privels da la natira durant in champ da vacanzas.

Ina stad da chaliras e sias consequenzas

Questa ficziun documentara, realisada dal reschissur da Cuir Daniel von Aarburg, vegn emessa en trais parts e porscha uschia la basa per ulteriuras contribuziuns e discussiuns. En il studio a Cuir èn tranter auter envidads sco giasts il climatolog Jan Sedlacek, il glaziolog Felix Keller e la gestiunaria dal WWF Grischn Anita Mazzetta.

Damain enviern, dapli stad

Las consequenzas dal stgaurament dal clima per il turissem èn centralas per la versiun rumantscha da la saira tematica. Annina Campell s'annunzia dal post extern sin il Crap Sogn Gion, ses giast è il visiunari da turissem Reto Gurtner. En il studio sa confrunta il schef da Grischn Vacanzas, Martin Vincenz, cun las dumondas davart il futur dal turissem grischn.

En tut las quatter linguas naziunalas – per rumantsch sin SRFinfo

La saira tematica naziunala vegn emessa en tut las quatter linguas naziunalas. La ficziun documentara e las contribuziuns èn las medemas sin tut ils chanals. Differents èn ils accents, la tscherna dals giasts e la lingua. Planisadas èn era colliaziuns tranter las regions linguisticas. La versiun rumantscha pon auditaras ed auditurs suandar sin SRFinfo.

Andri Franziscus preschenta l'emission da premiera che dura trais uras or dal studio a Cuir. Annina Campell s'annunzia dal post extern a Laax. La presidenta da la regenza Barbara Janom Steiner e la scriptura Romana Ganzoni han quella saira ina carte blanche per critica e dumondas sin las medias socialas. La versiun rumantscha da la saira tematica vegn emessa sin SRFinfo e sin rtr.ch. Online chatt'ins plinavant blers artigels e numerusas contribuziuns en connex cun il tema.

L'emission «+3°» da Radiotelevision Svizra Rumantscha pon ins guardar ils 29 da november 2017 a las 20.05 en directa sin SRFinfo. Sin ils chanals da social media pon ins prender part a la discussiun cun il hashtag #RTRclima.

Ulteriuras infurmaziuns

Radiotelevision Svizra Rumantscha, Via da Masans 2, 7000 Cuir
Tamara Deflorin, scheffa communicaziun, tel. 081 255 75 09, tamara.deflorin@rtr.ch